

全  
浙  
詩  
話

全浙詩話卷二十七

會稽陶元藻篁村輯

男廷珍  
廷琬  
編次

仁和朱文藻映濬

參訂

同邑宗聖垣芥颿

明

劉基

基字伯溫青田人元進士洪武初官至御史中丞封誠意伯正德中追諡文成有覆瓿集稊屑公集

國雅 公伊呂之佐文其緒餘耳故駿才鴻調工焉綺  
麗古風如思歸引思美人近體如古戍並出騷雅亦足  
以追步梁父憑陵燕公矣

金華詩錄 潛溪與青田同名青田仿昌黎二鳥作二  
鬼詩謂天以日月爲兩眼守之以結璘鬱儀二鬼也其  
曰一鬼乘白狗走向織女黃姑磯槌河鼓攀兩旗跳下  
黃初平牧羊羣烹羊食肉口吻流膏脂却入天台山呼  
龍喚虎聽指撫東巖鑿石取金卵西巖掘土求璫歲巖  
洞書石梁折驚起五百羅漢半夜撥刺衝天飛謂景  
濂也其曰一鬼乘白豕從以青羊青兔赤鼠兒便從閣

道出西清入少微浴咸池身騎青田鶴去採青田芝仙  
都赤城三十六洞主騎鸞翳鳳來陪隨神魁清唱毛女  
和長烟裊裊飄熊旗蜚廉吹笙虎擊筑罔象出舞奔馮  
夷自謂也二鬼去則筋節解折兩眼不辨妍與媿二鬼  
來則欲相約討藥與天帝醫其期許甚大推挹甚至又  
有詩寄潛溪云我思美人乃在仙華之山山前夜半挂  
河漢天津兩旗俯可攀我欲從之阻河關殷殷之意固  
有在也

委巷叢談 古人詠貓絕句甚多而用意各別黃山谷  
乞貓詩云秋來鼠輩欺貓死窺甕翻盆攪夜眠聞道狸

奴將數子買魚穿柳聘銜蟬喻小人得志冀用君子之意劉子亨云口角風來薄荷香綠陰庭院醉斜陽向人只作倖倖勢不管黃昏鼠輩忙語涉訕刺劉潛夫云古人養客乏車魚今爾何功客不如食有溪魚眠有毯忍教鼠噬案頭書語稍含蓄而督責亦露陸務觀云裏鹽迎得小狸奴盡護山房萬卷書慙愧家貧策勛薄寒無毡坐食無魚庶乎厚施薄責而報者自愧惟劉伯溫云碧眼烏圓食有魚仰看蝴蝶坐階除春風漾漾吹花影一任人間鼠化鴛真豁達含容法禁不施而奸宄自化信乎王佐才也

靜志居詩話

樂府辭自唐以前詩人多擬之至宋而

掃除殆盡元季楊廉夫李季和輩交相唱答然多採新  
題爲古體惟劉誠意銳意摹古所作特多遂開有明三  
百年風氣其五言古詩專仿韋左司要其神詣與相伯  
仲諸體均純正無疵若二鬼篇直欲破劉義之膽矣公  
在元時有和王文明絕句云夜深月白西湖水坐看三  
台上將星好事者遂附會之謂公望西湖雲氣語坐客  
云後十年有帝者起吾當輔之此妄也當公羈管紹興  
時感憤至欲自殺藉門人密里沙抱持之得不死明初  
既定婺州猶佐不抹宜孫拒守卽其酬和詩句如中夜

登高樓遙瞻太微座衆星各參差威弧何時正鴻鴈西北來安能從之飛周嫠不恤穰楚放常懷關却秦慕魯連存齊想田單蓋未嘗終日忘大都也是豈預自負身爲佐命者耶其題太公釣渭圖云偶應飛熊兆尊爲帝者師則公自道也世人多以前知目公至凡識緯堪輿若披肝露膽等書皆指爲公作豈其然乎

柳亭詩話 劉青田以佐命雄才時當末造揆其初意亦未嘗絕念於庚申君也如雜感諸詠有云淮海風雲連鼓角湖山花木怨笙歌古戍有狐鳴夜月高岡無鳳集朝陽江湖滿地蛟螭浪杭稻連天鳥鼠秋高牙畫戟

尊方伯繡段黃封出內朝塵埃不辨風雲色雨露全歸  
枳棘花濟世何人希管樂隱居無處覓求羊肉食不知  
田野事布衣深爲廟廊憂雄豪竊據皆屠狗功業興臺  
盡續貂胸中眼底有無限牢騷鬱勃之氣迨其後題望  
江亭曰興亡莫管前朝事江水東流去不還天時人事  
總付之不言之表而已非好以詩鳴也 劉青田旅興  
云倦鳥冀安巢風林無靜柯路長羽翼短日暮當如何  
此與老驥伏櫪之意相同按其神詣尚非西湖見五色  
雲時也題釣渭圖中二聯云浮雲看富貴流水淡鬚眉  
偶應飛熊兆尊爲帝者師宛如自寫小照其覆瓿集乃



元季作犁眉公集則明初作

按明史初稿言基爲胡惟庸毒死而世人遂有食黃蠟炒雞之說第考處州舊志云帝欲相楊憲基素厚憲曰憲有相才無相器帝曰汪廣洋何如基曰補淺難語休休有容胡惟庸何如曰小憤將債轅矣帝曰無踰先生基曰臣疾惡太甚且厭繁劇用之尤負聖明夫宰相者持心如水以義理爲權衡而已無與焉天下何患無人如目前諸人未見其可也惟庸聞而銜之基又乞歸惟庸乃教人上書誣基善相地彼有地曰談洋據山面海有王氣基欲得之基入朝引咎帝不問後惟庸入相基嘆曰惟庸當國殘民奚堪此重臣耶遂憂憤成疾帝遣使送基還鄉經一月薨夫曰毒死宜死於京邸而此曰還鄉一月薨豈受毒在前毒發在後耶且只言憂憤成疾而不及服毒事實志必本於家傳况細井之父老傳聞與子孫之事實節畧尤屬親切可徵何與史傳互異若此又嘗見明太祖賜基歸老青田書其畧曰不數年間天下一統當定功行賞之時朕不忘爾從未定之秋是用加以顯爵特使垂名於千萬年之不朽勒歸老於桑梓以

盡天年何期禍生於有隙致使不安若明以憲章則  
輕重有不可恕若論相從之始則國有八議故不奪  
其名而奪其祿此國之大體也然若愚蠹之徒必不  
克已將謂己是而國非卿善爲忠者所以不辨而趨  
前一則釋他人之愚論况親君之心甚切此可謂不  
察其名者歟惡言不出口者歟卿今年邁居京數載  
近聞老病日侵不以筋力自強朕因憫之可速往括  
蒼共語兒孫以盡考終之道云云基謝賜歸表內則  
明言於洪武四年二月初四日到家誼遺長男臣璉  
奉表詣闕拜謝聖恩其死於鄉更鑿鑿可據若惟庸  
遣人到青田謀毒其家恐不如是之拙矣史臣之筆  
亦難全信姑以俟諸博聞者其長子璉有父風爲江  
西參政卒於官仲子璟生時月食復光基笑曰天墜  
乃緒而卒能幹之者也弱冠咀喘經傳喜談兵二十  
八師事石樓之後薦授谷王長史并勅提督蕭遼燕  
趙慶寧六王府事一日至燕文皇與璟奕璟勝帝曰  
先主獨不少讓我耶璟曰臣可讓處則讓不可讓處  
則不讓帝默然建文改元靖難兵起馳閣獻十八策  
命赴李景隆聽征景隆不用璟計大敗璟夜半渡蘆  
溝河走良鄉跛行裂趾時璟子猶大同赴難遇璟翼

環上馬遁去環痛憤失策輿疾赴闕進聞見錄千萬  
言不聽命環歸待用壬午文皇帝入承大統環辭疾  
不起罪環逃叛繫赴京師強以官不受對帝猶稱殿  
下且尸毀下百世後終逃不得一箇字下獄卽夕辭  
髮自經死

宋 濂

濂字景濂浦江人元末用薦授翰林編修以親  
老辭入仙華山爲道士明初徵入授皇太子經  
克元史總裁官官至翰林學士承旨兼太子贊  
善大夫正德追諡文憲有潛溪翰苑芝園蘿山  
等集

臣鑒錄

宋濂應制咏鷹詩有自古戒禽荒句太祖曰

卿可謂善諫矣

碧里雜存 宋太史濂乞歸時御製詩二首餞之云白  
下開尊話別離知君此後迹應稀濂續云臣身願作衡  
陽鴈一度秋風一度歸上悅賜白金繆幣文綺曰與汝  
作百歲衣也自是歲一朝焉

金華詩錄

明詩綜錄景濂詩首哀海東傷妖女二操

蓋爲海東之史擊貪暴受誣而作也其詞亦有關於風  
勸傷妖女云眩白爲黑古亦多有自尤不遑敢誰之咎

和平之音風人遺則然此二操

穹霞操  
洞林操

自寫性情之作

且彈於雙溪之上婺州土風也錄此以誌先正遺韻

靜志居詩話

王子充叙景濂集云古今文章作者未

易悉數卽發而論南渡後有東萊呂氏說齋唐氏龍川  
陳氏各自成家而香溪范氏所性時氏先後又間出近  
則浦陽柳公烏傷黃公並時而作踵二公而起者爲吳  
傳正氏張子長氏吳立夫氏當呂氏唐氏之並起也新  
安朱子弟子曰勉齋黃氏實以其學傳之北山何氏而  
魯齋王氏仁山金氏白雲許氏以次相傳胡仲申叙王  
子充集云吾發以學術稱者至元中則金公吉甫胡公  
汲仲爲之倡後則許公益之柳公道傳黃公晉卿吳公  
傳正胡公古愚卓立並起而張公子長陳公君采王公

叔善又皆彬彬附和於下言文獻之緒者以發爲首稱  
合二公之言釋之金華文章理學之源備於是矣景濂  
於詩亦用力爲之蓋心慕韓蘇而具體者

柳亭詩話 洪武十年宋景濂侍上午門因乞歸上顧  
謂曰卿來此地跡應稀矣可能再見否濂對曰老臣身  
未就木當一歲一來華亭朱孟辨芾紀其事以詩送之  
有曰城上青雲暖更飛念卿此地跡應稀臣身願作隨  
陽鴈一度秋來一度歸此時主眷如是何末路蹭蹬乃  
爾耶

王  
禕

禕字子充義烏人明初徵爲中書省掾充元史

總裁官拜翰林待制奉使雲南抗節死建文初

贈翰林學士諡文節正統中改諡忠文有華川

玉堂二集

金華詩錄

王禕錢唐贈別姚卿詩評

讀此及前贈別張舜俞一篇

殷然民物之懷溢於紙上一種沈毅真至之情彷彿杜陵

明詩綜 俞汝成云忠文詩平易切實然在當時與宋

潛溪首倡浙東功不可泯

陶凱

凱字中立臨海人明初授翰林院編修歷官禮部尚書出爲湖廣行省參政復爲國子祭酒致仕後坐罪有陶尚書集

浙江通志 長至日太祖出宿齋宮凱謂不可無篇什以示後世遂以星臨萬戶動月傍九霄多爲韻凱首唱餘以次屬和太祖大悅命學士宋濂叙其首

三台詩話 時廷臣多作長平戈頭歌公詩未注意銷兵觀者以爲尤得體諸人莫及也

錢 唐

唐象山人洪武初刑部尚書



閒中今古錄 象山錢唐元末隱而不見年將六旬見  
四海定於一赴京敷陳王道先獻一詩詩曰大明洪武  
元年春春雷一聲天下響龍飛在天雨如膏天地山河  
增氣象山人昔住東海山山形如象山名丹丹山之南  
有白石山人隱遁松林間一朝陰氣蔽白日天地昏暗  
人變顏人既變顏心鐵黑山人鐵心仍鐵肝山人名不  
挂脣齒山人不與人相似吳江之上吳山青吳山有城  
高百雉好風吹步上京師鐵杖麻鞋見天子天顏悅懌  
天開明謹身殿中承聖旨致君堯舜端有時山人事業  
當如此詩奏卽授刑部尚書

郭櫓

櫓字德茂號暢軒晚稱台南兀者太平人舊隸黃巖授饒陽令

三台詩錄 暢軒雨中次希資韻云淒風淫雨驟十日  
下隰高原如九江雲氣欲來黑到地濤聲夜半寒動窗  
農人望歲苦至骨天地有心仁滿腔且復相從醉春酌  
街頭升米白魚雙拘律貴出之自然並非故變乎仄如  
此黑到地寒動窗苦至骨仁滿腔腰字皆一定不可改  
易宋人必有心爲之目爲杜體誤矣

汪一初

一初字陽復淳安人以白衣巡撫山西卒於潁

州

兩浙名賢錄 一初以詩文鳴洪武庚子守將荐之朝  
上方觀書命作詩立賦一絕以進有花影上堦春滿地  
讀書餘暇問蒼生之句卽命以白衣侍講

文藻按洪武建號於戊申未  
嘗有庚子此所紀干支誤也

許伯旅

伯旅字廷慎天台人洪武初由選貢官刑科給  
事中有介石集

浙江通志 伯旅以詩名時稱許小杜林公輔嘗見其

感興諸篇問其得何法而然伯旅曰法可言也法之意不可言也上士用法得法之意下士用法得法之似吾詩幾用法矣識者以爲不妄

三台詩話 吾鄉許給事伯旅廷慎才氣卓犖其論詩云上士用法得法之意下士用法得法之似吾詩幾用法矣意之所至詞必與俱固未嘗囿於法也又論宋詩亦高於元詞語工麗音節瀏亮宋或不及元至說古今道事理輕重明白豈元能及徐豐厓評吾郡詩首推伯旅以爲若天台雁宕雄踞東南小杜之稱固未容多讓所傳有介石稿

瞿元範

元範佑伯父

歸田詩話 吳元年國兵圍姑蘇臨危張士誠聚其族  
齊雲樓舉火焚之縊不死就擒王叔潤有詩哀之云天  
星夜墜水犀軍又見吳公走鹿羣睥睨金湯徒自棄倉  
皇玉石竟俱焚將軍只合田橫死國士今無豫讓聞風  
雨明年寒食節麥孟誰灑太妃墳先伯亦有絕句云虎  
鬪龍爭旣不能鷄鳴狗盜亦何曾陳平韓信皆歸漢只  
欠彭城老范增蓋張氏據有浙西富饒地而好養士凡  
不得志於前元者爭趨附之 美官豐祿富貴赫然有爲

北樂府譏之云卑羅帕兒緊緊紫梢頭戴方簷帽穿領濶  
袖衫坐箇四人轎又是張吳王米蟲兒來到了及城破  
無一人死難者武夫健將惟束手賣降而已詩意有所  
謂也

韓宜可

宜可字伯時會稽人洪武徵拜御史出爲山西  
布政謫雲南起爲左都御史

靜志居詩話 伯時詩見滄海遺珠句如松迷鶴徑深  
無路花暗簫聲不見人青天有月來今夜白髮無家度  
幾秋芳草東風沙上鳥青山遲日柳邊鶯均有思致

余郁

郁字尚則號訥齋黃巖人洪武中運司副使

三台詩錄 訥齋有秋閨三首云重重寶帳辟寒光撈  
盡爐灰夜轉長不是無心看牛女羅衣生怕汗秋霜翡  
翠衾寒月影孤西風吹夢到東吳曉來移却窗前榻怕  
見屏風蛺蝶圖雨歇溪源汨汨流水流無限似濃愁但  
將淚滴清溪上一夜隨波到隴頭情致纏綿措詞隱約  
首章從詩畏行露意化出尤得風人之旨

趙宜生

宜生字德純餘姚人宋宗室洪武初舉爲鄉邑

訓導

姚江逸詩 宜生值至正之亂晦跡耕牧自號騎牛野  
人宋無逸詩往來慰衰暮感慨寧無言謂宜生也其詩  
五言學陶七言彷彿李長吉

鮑恂

恂字仲孚崇德人元末貢士洪武四年充會試  
考官十五年以耆儒被徵授文華殿大學士固  
辭放歸有西溪漫稿

珊瑚網載聽雨樓諸賢記 鮑恂字仲孚嘉禾人元氏  
乙亥科易經進士爲本朝文淵閣學士爲人愼重不可



狎而學行名天下有學易舉隅行於世後以事累卒於外

明詩綜 周青士云西溪詩傳者絕少曩聞海鹽胡氏  
有利本求之不得嘗見其題畫詩云山橫紅葉晚寺鎖  
碧雲涼亦佳句也

按當日嘉禾張司令慕楊鐵崖名往迎之鐵崖謂其  
不知書勿應司令乃延鮑恂為師受業馬後池鐵崖  
乃往又鐵崖至嘉禾具廷臣以書幣為乞吳越兩山  
亭志并選諸詞人題咏楊郎為命筆稿將就夜已過  
半俄門外有剝啄聲啟視則皆嘉禾能詩者也率人  
人持金繪乞留選其詩揚笑曰生平三尺法亦有時  
以情少借苦詩文則心欲借眼眼不從心未嘗敢欺  
當世遂運筆批選止取鮑恂張翼顧文奕金炯四首  
謂諸人曰四詩猶為彼善於此諸什尚須脫胎耳然  
被選者無一人在諸人招日驚駭固乞寬假得與姓

名至有涕泣長跪者俱揮出門外閉關藏燭曰風雅掃地矣鐵崖於詩去取如此其嚴而鮑猶得在彼善於此之列豈非蠟中錦錦傭中佼佼耶

宋 僖

僖初名元僖字元逸餘姚人元末江浙副榜官繁昌教諭尋棄歸洪武初召修元史分撰外國傳事畢還山復與桂彥良同徵主考福建有庸庵詩集庸庵後稿

靜志居詩話 元逸有盛名詩見於選本絕少予購得其集句如欲雪未雪雲葉暗似暮非暮風花寒隔河鷄犬春聲急繞屋田園豆葉肥九歲兒郎能負米半生客

路未歸田當時未覺青山好此日重來白髮多臘月雨  
連元日雨故鄉人作客居人借人几榻開漁舍送客壺  
觴出酒家秉燭山林連夜宿思家道路幾人歸驚心世  
事三年後照眼梅花二月初且復殺鷄留宿客未須采  
藥入青山空中書寄仙人鶴月下詩成佛寺鐘臘雪已  
消三尺盡春潮初送一舟行試看墨本打碑賣勝謁朱  
門冒雪歸十日看山坐西閣一春多雨怕東風惡客不  
來成好夢大兵已過定豐年南山種樹人猶在東閣看  
花客再來勝地江山兵後見高天風雨客邊聞青春誰  
解看花去白髮真成秉燭遊身到名山頭已白眼明秋

日葉初紅惜春幾度行花經載酒先期過草堂落筆十  
年身後在懷人三絕眼中無梅梁水涸魚龍遠麥隴沙  
乾鴈鶩稀人日晝陰開晚照老年寒極愛春風艱難人  
事都非舊貧賤交情倍覺真黃葉又經秋夜雨青鞵曾  
踏歲寒冰南山臘雪新年在東浦春潮昨夜來樹繞石  
頭知客路巖迴谷口見人烟鐘聲曾聽孤舟夜詩卷今  
題落葉時二月江村三日雪百花時序半春陰對法流  
轉頗饒目然之趣其寄景濂學士詩云修史與末役乏  
才媿羣賢強述外國傳荒疎僅成篇則自高麗傳以下  
悉元逸手筆覽元史者所當知也

姚江逸詩 僖詩質而不枯熟而不庸入香山之室余  
從其族孫賓王得庸庵詩集十卷再令其訪尋文集則  
不可得矣一時交遊之盛風俗之厚山水之華酒痕墨  
跡猶可因詩以推尋其一二也

郭煜

煜字元亮太平人舊隸黃巖暢軒從子授新昌  
訓導

三台詩錄 元亮題洞黃黃氏集怡樓詩大山飛鳳小  
蟠虬中有幽人結翠樓碧檻靜臨花萼晝朱簾高捲雁  
行秋相看得句追靈運共喜謀生擬少游登覽豈無蘇

內翰題君孝友配前修一起興會何減崔司勳黃鶴樓  
尤妙二山語亦含兄弟事實通體貼切却無一筆落俗  
真高手也

桂彥良

彥良名德稱以字行慈谿人洪武初待詔公車  
以白衣賜宴除太子正字終晉府長史追贈編  
修謚敬恪有清節清溪山西挂笏老拙諸集又  
有春和詠言和陶詩中都紀行不在集內

靜志居詩話 長史以德望重韻語非其所長然如巴  
園五月好丹橘丙穴三春饌白魚亦少有風致吳江史

明古爲作傳稱孝陵嘗詠科斗云池上看科斗分明古  
篆文命長史續之應聲曰惟因藏水底秦火不能焚可  
稱敏捷

王蒙

蒙字叔明吳興人自號黃鶴山樵元末官理問  
洪武初爲泰州知州有黃鶴樵者詩集

靜志居詩話 倪元鎮詩畫最自矜重不輕許人獨題  
叔明畫云筆精墨妙王右軍澄懷卧游宗少文叔明絕  
力能扛鼎五百年來無此君其誠服如此高青邱云叔  
明爲趙文敏外孫而其畫法自立門戶別具一種姿致

與文敏無一筆相似其筆格不下文敏宜矣蓋文敏書畫詩皆尚工緻而叔明意在活脫所寫溪山林木或有柯無葉畫家謂之不了樹惟詩亦然往往不費推敲而有自然之致

妮古錄 黃鶴山人王蒙寫石梁秋瀑圖題其上曰梁挂飛泉遙噴雪山圍踈樹淨含烟幽人自愛清秋景閒坐虛窗對碧天周伯昂題云一道飛湍萬壑流平林如槭錦光浮山翁獨坐有何事洗耳端來笑許由耕雲題云林際飛泉銀漢長水邊細草紫蘅香奔流峽底雲雷起疑在佳山瀑布旁



按蒙湖州志作孟頫杭志及高青邱俱作孟頫外  
孫同時有崔彥暉字遼暉號雲林亦孟頫外孫善篆  
隸詞賦畫亦超詣隱居監橋市中以藥自給終身不  
仕其立品非獨勝於趙且高於王矣惜其詩不傳

唐 肅

肅字處敬會稽人元末爲嘉興學正明初召修  
禮樂書擢應奉翰林文字兼國史院編修謫佃  
濠卒有丹崖集

靜志居詩話 處敬詩與謝僉事原功齊名稱會稽二  
肅其爲學正也盡挈其家居攜李徐幼文送以詩云路  
出三江外程淹一日間高季迪詩云舟重全家去詩多  
一路題處敬亦有留別詩存丹崖集中當元之季浙西

歲有詩社而濮市濮仲溫豐於貲集一時名士爲聚桂  
文會以卷赴者五百人請楊廉夫評其優劣於是紀風  
土者目爲樂郊及楊完者亂州無完郭然繆同知思慕  
德謙猶招羣彥集南湖與會分韻者一十四人越二年  
曹教授睿新民復集諸公於景德寺亦有十四人

攜李詩繫 高啟有送唐博士移居攜李詩云楊柳發  
初齊春陰廢院西故人乘醉別新鳥傍愁啼舟重全家  
去詩多一路題杏花開北郭誰復共招攜其自作輓郭  
秉心詩亦有吾昔居秀州友有徐一夔之句明初以薦  
擢爲編修罷歸卒肅文章稱大家時有唐劉毛蔡之目

章溢

溢字三益龍泉人初受禿堅不花請屢平蘄黃  
不受爵結廬匡山明太祖興召見金華擢僉營  
田司事洪武元年拜御史中丞尋兼太子贊善  
大夫

柳亭詩話 名勝志云龍泉縣有白馬墓卽開國勛臣  
胡公深之桃花馬也公征陳友定遇害馬馳歸悲嘶而  
隕因葬之號白馬墓章溢有詩曰硃砂染辮色重臺勾  
引春風上背來慎勿解鞍橋下浴恐隨流水入天台

按胡深字仲淵處州龍泉人天資學識迥出人表尤  
精鎗馬明太祖初命深總制處州諸暨守將謝再興

叛兵犯東陽李之忠擊走之深引兵爲援議爲城守  
其後浙西將李伯貞大舉入寇以城堅不可拔敗績  
而去帝念深立城功以名馬賜之迨福建陳友定擾  
邊深奉命征之建守將院德柔兵屯錦江深進擊之  
破其寨柵友定大懼率銳卒亟圍深突  
陣與決馬蹶被執所謂桃花馬者卽此

### 陳基

基字敬初臨海人仕元至江浙行省郎中參張  
士信軍事尋參太尉府軍事遷學士院學士吳  
平召修元史賜金而還有夷白齋稿

靜志居詩話 敬初家臨海丹邱之麓其在吳結小丹  
邱戴叔能爲作記其詩亦叔能所編顧仲瑛輯前後交  
友詩爲玉山雅集柯敬仲以下卽次以敬初謂同輩極

力追之不及蓋當時之月旦然矣

攜李詩繫

顧阿瑛崑山人元季辟會稽教諭不就築

室茜涇曰玉山佳處園池聲妓之盛甲於一時招致海  
內名士置酒賦詩張士誠入吳遂遁跡嘉興之合溪營  
別業居之釋來復有寄題合溪別業次韻詩云草堂合  
溪上雲石靜無氛春水鱸三尺秋風鶴一羣行厨依竹  
見吹笛隔花聞最喜逃禪好蒲團擬共分不食諸侯祿  
閒居避俗氛岸花紅作陣沙鳥白爲羣貝葉風前讀菱  
歌月下聞清遊難再得愁絕一江分陳基有寄仲瑛寓  
嘉興詩每憶吳門顧碎疆舊開池館帶滄浪綠波芳草

盟鷗鷺錦瑟玉笙悲鳳凰座客詩成誰最好故人酒後  
我多狂扁舟獨往駕湖上老到猶能賦草堂

三台詩話 陳基敬初臨海人從家吳結小丹邱致故  
鄉之思詩文名重一時淮張幕府文檄多出其手浦江  
戴叔能稱其爲文雍容紆徐如冠冕佩玉周旋堂陛之  
上得之黃公者深及死哭以詩曰師門偉器今餘幾藩  
國奇才獨數君蓋九靈與同師金華文獻公又同在張  
吳幕至厚也韋羌詩諸體咸備尤長於古顧玉山每言  
同輩極力追之不及兄聚詩亦清婉

胡翰

翰字仲申又曰仲子金華人洪武初以薦授衢  
州教授召修元史成賜金帛遣歸有胡仲子集

金華詩錄

仲子五言摹古如夫子杏壇圖不必定爲

吳道元筆亦當出陳閔李思訓手惜不得本集讀之僅  
從明詩綜錄存十八首又按洪武元年冬十二月詔發  
所藏元十三朝實錄撰修元史命宋濂王禕爲總裁官  
徵山林隱逸之士凡十六人同修仲子與焉有送呂君  
采元史詩云又見陳農去遙臨析木墟山川遊幸後文  
獻亂離餘備極傳聞異歸從直筆書百年殷監在盡獻  
玉階除其時因順帝無實錄可徵遣使行天下采史事

上之至明年開局續修仲子已歸不復共其事矣

靜志居詩話 明初浙東睦有徐舫詩派甌有趙次誠

詩選越有求漁鍾秀集而金華承黃文獻潛柳文肅貫  
吳貞文萊諸公之後多以古文辭鳴顧詩非所好以詩  
論吾必以仲申爲巨擘焉獨孤及之論曰五言之源生  
於國風廣於離騷著於蘇李盛於曹劉漢魏作者質有  
餘而文不足以今揆昔則有朱絃疏越太羹遺味之嘆  
誦仲申五言正猶路鼓出於土鼓篆籀生於鳥跡庶幾  
哉升堂之彥乎宜潛溪有學林老虎文淵鯨之目也  
韓門綴學 元志何渠食貨俱不及梁山灤惟於決隄



偶序及之明洪武初胡翰有夜過梁山灤詩云洸河帶  
灤水百里無原隰葭茨參差交舟楫窈窕入又云往時  
冠帶地孰踵荏苒習肆噬劇跳梁潛謀固懷墊是明初  
猶有水有盜也景泰間河決沙灣徐有貞請開廣濟河  
謂其外有八十里梁山泊可恃以爲泄其地之窪下而  
閒空可知今人見其無水并疑小說言有水者爲謬豈  
知地在宋元爲衆水之所聚哉

徐尊生

尊生字大年淳安人洪武時召修元史授翰林  
應奉文字有懷歸臺

金華詩錄

淳安徐尊生佩刀行序云金華之永康有山曰雲巖拔起天半有巨舟藏壑中舟尾翹出如蕙一釘陸巖下野僧得之以遺張君孟兼製爲佩刀鈔利特甚尊生爲作歌歌曰神人藏舟半天裏絕壁崕呀露舟尾錚然有物度中宵八觚陵嶒長尺咫野僧拾之歸張公化爲天矯蒼精龍不知何世何年闕奇氣剗犀斷虎一旦生神通魑魅卻走妖邪空張公佩到蓬萊殿天上神仙驚未見青絲緹懸白玉環當晝孤光搖冷電爲君淬厲向盤根縱有青萍何足羨他年辭榮歸浙山莫行金華赤松間精靈感會起霹靂便恐飛去無時還錄此

備雲巖故實

靜志居詩話 大年詩律清老譬諸畫手絕無鉛粉之飾顧諸選家多不甄錄何也其懷歸集中有授翰林應奉詩布衣昨日孤寒士翰苑今朝已授官云云則當日業通籍矣又呈崔尚書五古則禮部尚書亮也大年雖自引求去而省臣留之續修庚申君史又編集禮樂書迨三年九月大明集禮書成乃始得歸故鄉故歸舟詩云兩年留滯帝王州也至六年九月詔編日歷復與纂修之列又固辭還山拂帝意出爲陝西教授未行而卒睦州志謂曾授翰林待制不就誤矣

按洪武初年詔舉勝國遺逸尊生與馬乃命修庚申  
君史又緯集禮書追翰林學士承旨宋濂乞致仕上  
問卿歸誰可代者濂以尊生對始拜翰林應奉草制  
悉稱旨蓋其修書在布衣徵召之初官翰林在宋濂  
薦代之後中間尚隔數年非既授翰林始與編纂也  
後人俱泥看布衣昨日翰林今朝八字遂致先後踪  
跡模糊舊陸州志固悞  
靜志居亦未得其詳

鳴缶集 徐尊生大年之赴恩命也素無官情不勝簪

組其授翰林供奉詩云布衣昨夜孤寒士翰苑今朝已  
拜官豈有文章淹滯久獨憐筋力進趨難追班香案晨  
簪筆坐列宮門午賜殮早晚歸休宜引分莫教白髮玷  
金鑾尋以老疾乞歸

林右

右字公輔又字左民臨海人洪武時辟王府敎授

三台詩錄 公輔氣高才敏於人鮮推許方希直懷舊詩云雄文不見林公輔病眼荒荒何處開又以不安小成不諉小利相許其學行可知惜詩多不傳

王貴學

貴學號石川餘姚人

姚江逸詩 貴學號石川元提舉嘉間之子爲仇家所誣謫戍關西與其子仕伊別於南京作詩人傳誦之見於許浩復齋日記

張孟兼

孟兼名丁以字行浦江人明初徵爲國子學錄  
與續修元史遷太常丞出爲山西按察司僉事  
遷山東按察副使有白石山房稟

金華詩錄 孟兼曾爲謝皋羽西臺慟哭記冬青樹引  
作疏載宋遺民錄今讀此詩

豫讓橋

凜凜然敦尚大節者

也 又詠茶云佳品龍門種先春長碧芽原注金華之  
紫旌龍門者最佳龍門宋太史舊讀書處也 又有漫  
興二首云梨花半開夜雨催無奈李花如雪堆門外美  
人不見來東風楊柳吹千回青驄驕嘶金鞵銜美人二

月戴春衫江頭麥秀青蘄蘄西湖放船開錦帆明詩綜  
詩話云杜子美有漫興五絕九首又七古云老去詩篇  
渾漫興言卽景口占率意而作也其後蘇子瞻黃魯直  
楊廷秀諸公皆襲用之押入語韻陰時夫輯韻府羣玉  
亦采入語字韻中元以前無有讀作漫興者迨楊廉夫  
作漫興七首妄謂學杜者必先得其情性語言而後可  
得其情性語言必自其漫興始而其弟吳復見心從而  
傳會之注云漫興者老杜在浣花溪之所作也卽眼前  
之景爲漫成之詞其言語似邨而未始不俊此杜體之  
最難學者世之人遂盡改杜集之舊易與爲興矣首沿

其訛者張孟兼也

朱廉

廉一名世廉字伯清義烏人洪武初徵修元史  
日歷除翰林編修遷楚府長史有集

金華府志 洪武八年乘輿巡幸中都命廉扈從至滁  
州比至中都進詩十首上覽而大喜曰佳詩朕爲和有  
頃賜和詩六首當時以爲榮

冷謙

謙字啟敬嘉興人元中統初爲僧至元間棄釋  
從儒善畫有異術至正間年已百餘歲洪武初



授太常司協律郎郊廟諸樂章多出其手自號  
龍陽子不知所終

靜志居詩話 世傳協律仙去嘉興府治東北碧漪坊  
建祠祀之里人禱夢多驗著作罕傳僅從郁氏書畫跋  
錄得一首題燕肅山水卷云依稀廬岳高僧舍彷彿商  
山隱者家我亦抱琴來谷口白雲深處拾松花

鄭涉

涉字起深太平人舊隸黃巖洪武中樂清訓導  
有正直齋稿

三台詩錄 起深客夜詩云西風蕭蕭木葉稀秋深作

客何時歸城頭月出照擊柝江上露寒催擣衣燕鴻附  
書孰可致烏鵲繞樹還驚飛三更不眠欲起舞躍馬卧  
龍誰是非觀末語參以登樓作蓋客四明時感方氏割  
據而發拙拘處極力摹杜明詩別裁集誤作黃巖作

貝瓊

瓊字廷琚一名闕字廷臣崇德人洪武初與張  
孟兼同徵續修元史除國子助教尋遷中都國  
子助教有清江集

輟耕錄 姚文公燧爲翰林學士承旨日玉堂設宴歌  
妓羅列中有一人秀麗閒雅微操閩音公使來前問其

履歷初不以實對叩之再泣而訴曰妾乃建寧人氏真西山之後也父官朔方時祿薄不足以給侵貸公帑無償遂賣入娼家流落至此公命之坐仍遣使詣丞相三寶奴請爲落籍丞相素敬公意公欲以侍巾櫛卽令教坊除籍公得報語一小史曰我以此女爲汝妻女卽以我爲父也史忻然從命京師之人相傳以爲盛事云嘉興貝闕嘗有詩曰斷絲棄道邊何日緣長松墜羽別炎洲不復巢梧桐昔在至元日六合車書同玉堂盛文士燕集來雍雍金刀手割鮮酒給葡萄濃坐有一枝春秀色不可雙娉婷劉碧玉綽約商玲瓏寶釧金雀釵已覺

燕趙空或聞操南音未解歌北風上客驚且疑姓氏初  
未通問之慚復泣乃起陳始終妾本建寧女遠出西山  
翁父母生妾時謂是金母童梨花鎖院落燕子窺簾櫳  
迢迢官廨方位卑食不充侵貸國有刑桎梏加父躬鬻  
女以自贖白璧淪泥中秋娘教歌舞屢入明光宮永爲  
娼家婦遂屬梨園工京華多少年門外嘶青驄不如孟  
光醜猶得嫁梁鴻自傷妾薄命失落似秋蓬客聞爲三  
嘆天道何懵懵遣使白宰相削籍歸舊宗小史十八九  
勿恨相如窮配爾執箕帚今日看乘龍鴛鴦並玉樹鸚  
鵡開金籠棄汝桃花扇紅牙不復從提瓮自汲水絺綌

自禦冬時多困輶軻事或忻遭逢安知百尺井忽登羣  
玉峯借問爲者誰內相姚文公

靜志居詩話 貝瓊詩爽豁類汪朝宗整麗似劉伯溫  
圓秀勝林子羽清空近袁景文風華亞高季迪朗淨過  
張來儀繇繹愈孫仲衍足以領袖一時

櫺李詩繫 貝瓊師同邑黃次山及會稽楊廉夫其在  
史館時與金華宋景濂友善凡有撰著互相推讓亦一  
時兩雄也黃巖方行贈詩曰父山仙翁髮如雪胸蟠太  
初吐日月手中鍊石輕女媧五色曾將補天裂其推重  
如此著有清江集其詩博大警拔較然不羣才質當不

在高陽以下

柳亭詩話 龍生九子末名椒圖形似螺蚌性好閉門  
故以司門見瓊未央瓦硯歌長安昨夜西風早錦繡椒  
圖跡如掃升庵謂閱陸文童菽園雜記始悉其義按陳  
孔英名都篇九華雕玳瑁百福上椒圖謂是屈戌金鋪  
之類亦可

桐鄉縣節烈志 濮彥仁妾龐氏唐氏俱濮院鎮人初  
從彥仁有姿容仁鍾愛之迨洪武初籍濮氏家官收其  
產二氏義不辱遂自經而死程巽隱貝清江俱爲詩弔  
之比於綠珠之墜樓焉

童冀

冀字中州金華人洪武初徵修書官湖州府學教授調北平坐罪卒有和陶集

金華詩錄 水車罾泥一作陳田家之苦較唐聶夷中  
田家詩更爲盡情水車云輪盤團團徑三丈水聲卻在  
風輪上罾泥云船頭跼人船尾立又云竹筐漉泥如濁  
醪形容酷似畫不能到又贈丹崖隱者詩評云此詩當  
是客零陵日被徵而作也中有云宏文館深難置足神  
武門高宜挂冠豈卽修書之徵而意不果於出與按方  
輿勝覽丹崖在零陵隴下石色如丹唐永泰中有隴水

令唐節去官家於崖下自稱丹崖翁元結刺道州路出崖下見節甚重之因爲作宅刻銘有曰礧礧丹崖其下誰家門前斷舟籬上釣車故中州託意於此爲丹崖隱者之贈惜事無所考

明詩綜 姚廣孝云中州才力老成問學淹貫二十年奔走南北雖涉歷世故樂天知命有合於靖節之志趣其和詩如藹抽泉決不見其艱窘矧有牽強者耶

張翼

翼

明詩綜云或作翼

字翔南建德人徙居嘉興元至正乙巳舉於鄉薦主甬東書院山長不就吳元年



徵入禮局告歸有梓宇集

靜志居詩話 辛丑夏留湖上昭慶僧舍時曹潔躬周  
元亮施尚白諸先生先後來遊杭人有持元西湖竹枝  
請曹先生甲乙者先生謂曰和者雖多要不若老鐵次  
日羣公泛舟於湖曹先生引盃曰鐵原倡之外誰云擅  
場各舉一詩不當者罰周先生舉陸仁良貴作云山下  
有湖湖有灣山上有山郎未還記得解儂金絡索繫郎  
腰下玉連環施先生舉張簡仲簡作云鴛鴦蝴蝶盡雙  
飛楊柳青青郎未歸第六橋邊寒食雨催郎白苧作春  
衣南昌王猷定於一舉嚴恭景安作云湖中女兒不解

愁三五盪漿百花洲貪看花間雙蛺蝶不知飛上玉搔  
頭吳袁于令令昭舉強玘彥栗作云湖上兒女學琵琶  
滿頭多插鬧粧花自從彈得陽關曲只在湖船不在家  
武進鄒祇謨訝士舉申屠衡仲權作云白苧衫兒雙髻  
了望湖樓子是儂家紅船撐入柳陰去買得雙頭茉莉  
花錢唐胡介彥遠舉徐夢吉德符作云雷峯港口晚凉  
天相喚相呼出采蓮莫爲采蓮忘却藕月明風定好回  
船蕭山張杉南士舉繆侃叔正作云初三月子似彎弓  
照見花開月月紅月裏蟾蜍花上蝶憐渠不到段橋東  
山陰祁班孫奕喜舉釋文信道元作云湖西日脚欲沒

山湖東月出牙梳彎南北兩峯船上看恰似阿儂雙髻  
鬟錢唐諸九鼎駿男舉馬琬文壁作云湖頭女兒二十  
多青山兩點明秋波自從湖上送郎去至今不唱江南  
歌予曰諸公所舉皆當然未若吳興沈性自誠之作也  
其詞云儂在西湖日日愁郎船只在東江頭憑誰移得  
湖山去湖水江波一處流不獨寄託悠遠且合竹枝縹  
緲之音曹先生曰然於是諸公皆飲予亦浮一大白回  
思舊事四十年矣錄翔南詩其旨與沈作畧同又吳世  
顯彥章詞云湖中日日坐船窗水面鯉魚長一雙好寄  
尺書問郎信惱人湖水不通江意亦相合然俱未及沈

之俊逸也張翥西湖竹枝詞南高北高峯頂齊錢唐江水隔湖西不得潮頭到湖口郎船今夜泊西溪

陳季鏞

季鏞字公成寧海人洪武四年進士官終廣東鹽庫司提舉

三台詩錄 公成秋日送僧道生歸廣福寺云竹榻冷多時康山此話歸獨行清飯曉一路赤楓飛世病誰能藥天寒不爲衣從知得道者隨遇卽無機三四自然入妙意境何減老杜雨邊山水合終日子規啼

錢宰

宰字子予一字伯均會稽人元進士明初徵修  
禮樂書授國子助教乞歸召較書翰林致仕有  
臨安集

靜志居詩話 博士吳越武肅王十四世孫孝陵命撰  
帝王廟樂章稱旨每進見輒賜坐侍食嘗賦早朝絕句  
云四鼓蓼蓼起著衣午門朝見尚嫌遲何時得遂田園  
樂睡到人間飯熟時明日文華燕畢帝諭曰昨日好詩  
朕曷嘗嫌汝何不改作憂字又曰朕今放汝去好放心  
熟睡矣乃遣還

曝書亭集

洪武二十七年詔徵儒臣定正尚書蔡氏

傳宰暨張美和揭軌等二十六人皆被名命開局翰林院賜宰等綺繪衣被入朝班侍衛之首讌坐殿中時帝建酒樓於城門外其一曰醉仙命宰等飲其上并給以鈔宰等各獻詩稱謝

湖山便覽 鎖瀾橋卽蘇隄第二橋與西岸第五橋對通赤山麥嶺路錢宰看梅圖詩花落西泠第二橋

吳越所見書畫錄 元王元章墨梅立軸乙未春正月閏爲仲剛寫於識趣臨安錢宰伯均題詩云每憶山農王處士見花長作故人看縞衣綽約春來瘦風節嚴凝雪後看又天台王俊華題詩云會稽寫梅妙天下前代

名公總其亞醉拈霜兔掃長梢一紙千金索高價往年  
嘗客燕帝京權門貴戚來傾城巧求重購苦難致富貴  
於我鴻毛輕有時大叫縱豪爽奇氣颯如風火生山莊  
野寺畫都徧一日四海皆知名垂老歸來越山曲爛漫  
千株栽繞屋積雪平簷坐獨看收得寒香三萬斛百年  
去逐咸平仙忍將落墨人間傳風流有子喜不泯只今  
合置諸公前

趙謙

謙字撝謙初名古則餘姚人洪武初徵修正韻  
以年少黜爲中都國子監典簿罷歸尋以薦召

爲瓊山教諭卒於官築考古臺有考古餘事

靜志居詩話 明祖正韻一書出自獨斷天子考文諸臣敢不敬應撫謙於六書四聲最精焉肯盡棄其學而順帝之則其見黜也必因不苟附和而然不在年少也旣歸築考古臺述聲音文字通書成賦詩云文字聲音歎久訛十年辛苦事研磨誰云沈約知音甚未許揚雄識字多魚魯從今堪辨析鼎鼎由昔費摩挲總憐用舊微鍾子歸卧雲山看薜蘿當知臺名考古心非正韻爲今矣

姚江逸詩 義按先生之詩有考古餘事千篇當時未



曾傳世今得之於後人者止此而已

李 毓

毓字長民號藥所太平人舊隸黃巖洪武中三  
舉明經不就

三台詩錄 藥所中秋有感云水色清無際天光淨欲  
流不知今夜月還是幾分秋蘅芷湘江怨龍蛇草澤謀  
濁醪芻未得何以慰沈浮蘅芷湘江屈平義不忘楚此  
藥所以終身不出非徒淡於名利

呂不用

不用初名必用字則行後字則耕新昌人洪武

初舉本學教諭以龔辭自號石鼓山龔有得月  
臺

明詩綜 曾伯曼云則耕詩老邁放曠有傲世不羈之  
懷蓋山林草木之秀傑也王叔雨云則耕長篇短歌無  
一語塵腐

陶宗儀

宗儀字九成黃巖人元末舉進士不第棄去流  
寓松江累徵不就洪武初徵入京以病辭歸有  
滄浪權歌南村集

珊瑚網 管夫人畫懸崖朱竹爲陶九成藏會稽王冕

題詩云瀟灑三君子是伊親弟兄所期持大節莫負歲  
寒盟跋云赤城陶君故家子也余寓西湖之東九成時  
來會談論竟日退有不忍舍者其仲季皆清爽真芝蘭  
玉樹晉之王謝家也遂題而歸之 又宗儀自題李薊  
邱秋清野思云一代衣冠李薊邱簞簞落筆似湖州題  
詩諸老并淪沒風雨江南幾暮秋

明詩綜 陶宗儀字九成黃巖人有滄浪櫂歌南村集  
唐人綰云公以黍離麥秀之餘而有駿發蹈厲之氣撫  
羈窮淪落之景而無危苦憤激之辭足以見其所存矣  
三台詩話 陶九成自言家天台萬山中茅屋可以莚

風雨石田可以具饘粥每春夏之交落花滿徑禽聲上  
下味唐子西山靜似太古日長如小年句可謂絕妙風  
塵瀕洞賦歸歟之詩未知何日可以遂志也九成娶將  
軍費雄女因居松江嘗見題楊竹西草亭卷冊小印主  
一齋而自署涿郡蓋舉郡望猶杜清獻公稱京兆耳

全浙詩話

卷十七

十四

全浙詩話卷二十七終

全浙詩話卷二十八

會稽陶元藻

男 廷珍  
廷琬 編次

仁和朱文藻映濬

參訂

同邑宗聖垣芥颿

明

陶宗儒

宗儒字漢生宗儀弟洪武時官禮部員外郎

浙江通志

宗儒與會稽陶肅上虞謝肅等一十九人

以詩名於時號稱皇明雅頌

沈夢麟

夢麟字原昭歸安人有花谿集

宏治湖州府志 元昭少有詩名元時以乙科授婺州學正遷武康尹以疾去洪武間五主文衡於閩浙年九十三卒詩有盛唐風時人稱爲沈八句

靜志居詩話 原昭元季隱於花谿劉伯溫曾相依谿上贈以詩云杜陵老去詩千首陶令歸來酒一樽及大明雖不受爵而校文閩浙者三同考會試者再故孝陵以老試官目之花谿歸安縣治東南七十里土人名曰花城原昭詩極清穩特少警拔句

高明

明字則誠瑞安人元至正進士爲處州錄事洪武初被徵辭以老疾有稟名克齋集

歸田詩話

岳王墓詩自董靜傳如公更緩須臾死此

敵安能八十年之後趙子昂南渡君臣輕社稷中原父老望旌旗世皆稱誦和者二人亦僛作也徐孟岳云童大王回事已離岳將軍死勢尤危直教萬歲山頭雀去遶黃龍塞上旗飲馬徒聞嘶鞚洛洗兵無復望條支湖邊一把摧殘骨蓋世功名百世悲高則誠云莫向中州唱黍離英雄先死繫安危內庭不下頒師詔絕漠全收



大將旗父子一門甘伏節山河千里竟分支孤臣尚有  
埋身地二帝遙寬更可悲少日過葛嶺憶有人題墓  
上云山前有客祠彭越塞上無人斬月支和支字韻亦  
佳當時不能全記再過之則已慢之矣又有人爲排律  
一首云北狩君親遠南遷將相夸偷安依鳳巘抱恨寄  
龍沙咨岳歸神器遭秦載鬼車結句云太師墳上土遺  
臭遍天涯蓋江海自蔡州回駐軍牧牛亭命軍士於秦  
檜塚上便溺以快人意人因謂之遺臭塚云

靜志居詩話 顧仲瑛輯元耆舊詩爲玉山雅集中錄  
高則誠作稱其長才碩學爲時名流可知則誠不專以

詞曲擅長也世傳琵琶記爲薄倖王四而作此殆不然  
陸務觀詩云斜陽古柳趙家莊負鼓盲翁正作場死後  
是非誰管得滿村聽說蔡中郎是南渡日已演作小說  
矣聞則誠填詞夜案燒雙燭填至喫糠一齣句云糠和  
米本一處飛雙燭花交爲一洵異事也蔣仲舒堯山堂  
外紀謂撰琵琶記者乃高拭其字則成別是一人按涵  
虛子曲譜有高拭而無高明蔣氏或有所據俟再考

張庸

庸字惟中慈谿人元末署上虞長明初聘不仕

育全歸集

靜志居詩話 惟中高遜世之節然與龍提學子高桂  
正字彥良烏永新繼善諸君子先後往還倡和其送胡  
維舟金陵歌云金陵帝都天下壯萬國會同天浩蕩昔  
年聘我我曾遊會上鳳凰臺上頭則明初亦嘗受聘幣  
而未通籍者殆昔人所云隱不違親貞不絕俗者耶

李 奕

奕字宗表其先汴人元末徙居錢唐結草閣北  
關門外稱草閣先生明初以薦官國子助教以  
病免卜居永慶遂爲永康人有草閣集

金華詩錄

按明詩綜錄草閣詩以爲錢唐人蓋草閣

原因錢唐北關門外之居名也然壽山方巖石室大通  
寺屢屢見諸吟詠誕日醉吟云近來結屋翠峯下我家  
住近東屏山則其移居永康可徵詩粹傳畧及郡志皆  
云少從永康鄭僖遊奇其才以女妻之若其遷永康依  
婦翁者然考之縣志則從永嘉胡僖遊妻以女者亦胡  
僖事在徙家錢唐之初其卜築永康魁山則在宦歸之  
後因避亂金華翱翔永康東陽二邑間愛其山水故也  
縣志傳草閣云照應志應志者嘉靖間應僉憲廷育作  
先民傳後邑令吳公安國卽取之以作志人因名之曰  
應志嘉靖去洪武未甚遠應以永康人言永康事必核

故從之

靜志居詩話 草閣得詩法於李季和然季和猶爲廉  
夫薰染草閣歌行則一氣孤行獨開生面正如淮陰之  
師多多益善囊沙拔幟辟易萬人當時四傑十友二肅  
二方各相標榜如此逸氣高格顧詩家月旦不及焉信  
夫知音者之難也

金 礎

礎字廷器黃巖人水南子著有東蘭集

三台詩錄

廷器牧牛詞云牧牛在平坂牛飽心卽安

插花滿了髻蘆管西風寒誰家烟火起日脚射江水叮

寧莫亂行道旁有禾黍斜披短簑衣不管閒是非手拔  
青竹弓野鳥雙雙飛只寫出自足意言外不必別有寄  
托收處音節頗似古謠諺

貝 翺

翺字秀翔崇德人瓊第三子洪武初以薦官楚  
府紀善有平濬集

靜志居詩話 紀善集以平淡名故管長史寄詩云花  
竹臨窗筆硯清初秋一雨便涼生錦囊平淡詩千首近  
日新編幾卷成詩如夕陽山好樓中見春水船齊樹杪  
行信乎平淡矣所云山者蓋指父史二山

烏斯道

斯道字繼善慈溪人自號四明山人明初以薦  
知石龍縣調永新有秋吟稟春草齋集

靜志居詩話 布政楊子器稱其詩曰疎秀若雨後春  
山綺麗若雲中翠巘矜許至矣戴叔能贈詩云達士不  
羈世投身向寬閒又云不有同心人誰其慰枯槁知非  
營營名利者也句如川顛聞無人一鳥空中鳴江水豈  
吾限可以相往還朝陽煦游鯨晴風送飛翼寂焉千載  
事傷此百年身落日近崦嵫於何從遠道鶴鳴子不和  
徒然有哀音具饒清氣其言曰詩之作非得夫天地之

精氣者不能也信然哉

凌雲翰

雲翰字彥翀錢唐人元末蘭亭書院山長明初  
以薦授成都教授有柘軒集

歸田詩話 鄉丈凌彥翀名雲翰號柘軒洪武庚申冬  
爲人題鐘馗圖云朔風吹沙目欲眯官柳搖金梅綻蕊  
終南進士倨然起帶束藍袍靴露趾手掣硬黃書一紙  
若曰上帝錫爾祉蝟蟻於思含老齒頤指守門荼與壘  
肯放妖狐搖九尾一聲爆竹人盡靡明日春光萬餘里  
不數日爲鄉人官於外者飛舉里胥臨門不容辭避迫



全宋言詩 卷二十一  
脅上路到京授四川學官遂成詩識在任以之貢舉謫  
南荒以卒歸骨西湖予送之葬有絕句云一去西川隔  
夜臺忍看白壁瘞蒼苔酒朋詩友凋零盡只有存齋言  
雨來蓋感知己也

靜志居詩話 柘軒學於陳衆仲故其詩華而不麗馳  
騁而不離乎軌五言如陪祭作七言如鬼獵圖才情奔  
放不可羈勒直可褰郁離之旗摩青邱之壘集中與張  
行中論詩云艱深文淺近臭腐化神奇每到真成趣由  
來不費辭其自得之深矣

程本立

本立字原道一字彥德崇德人洪武初以薦授  
秦周二府引禮謫滇建文初徵入翰林陞僉都  
御史靖難時自經於應天府學有異隱集

靜志居詩話 建文諸臣文莫過於方希直詩莫過於  
程原道希直之文取法昌黎下亦不失爲蘇子瞻原道  
之詩刻意杜陵下亦不失爲陳簡齋也

### 李 參

參字景參麗水人有泉石稿

括蒼彙紀 參詞華敏瞻吟咏得盛唐體洪武初參弱  
冠詣京師應制賦鍾山曉霽長律稱旨賜宴罷命需次

錄用以毋辭歸家政肅如三世不異爨

練魯

魯字希曾松陽人有宦侗集

括蒼彙紀 魯至正間中第南還明太祖詔求人才有  
司辟魯應聘不得已至武林作辭病詩九首聲調悲壯  
思志沈鬱若不知其意之所在歸而閉門謝客復撰朝  
會樂歌六章喜聖人之世出慶遭逢之不偶卓然可以  
傳後

鄒韶

韶字九成吳興人

湖州府志 九成好讀書慷慨有氣節辟試漕府掾不  
事奔競淡然以詩酒自樂作詩追蹤盛唐楊廉夫以爲  
與北州李才輩相上下

張夢庚

夢庚松陽人

處州府志 夢庚遇異人授易元末名居將幕推步有  
驗後復懸於市賣卜一日有葉姓者無子多娶妾求卜  
庚以詩二句授之曰不是桃花貪結子更教人恨五更  
蜂持歸謂此老風字且不識何談理數乎其人養蜂數  
檀一旦蜂出冒雨收之忽集其面螫而死人以爲神焉

莫維賢

維賢更名昌字景行錢唐人

柘軒集 隱君景行嘗訪吳松故時所遇題詠目曰雲  
間紀遊計平昔所爲詩詞等號爲廣莫子豪又有和陶  
詩集纂名物鈔若干篇藏於家君未厭世而慕陶潛劉  
伶之達爲壙志詩有待於觀化之歲月斯可謂之達者  
馮應奎

應奎字景神號松坡甬東人以進士官漳州通  
判

風雅閒談 甬上耆舊集言松坡老筆蕭疎擺落宿氣

及觀其山行贈野叟云適意不知春有盡忘憂反覺酒  
無權又靜院云登巔却嫌人事擾貪眠獨喜夜更長殊  
覺真率有味

徐一夔

一夔字大章天台人

三台詩話 天台徐大章一夔博學善屬文危素薦授  
建寧路教授元末避兵於嘉興之白苧里面水屋僅三  
楹牖外一大柞樹其高倚雲因作獨柞記以見志有小  
集南湖與同守繆恩恭司農丞郁遵等分韻得久字憩  
景德寺與永嘉曹睿分韻得半字詩水西僧雨菴藏其

跡所謂庚辛倡和詩也明史入文苑傳近時王阮亭尚書鈔得遺集四冊無詩目

孫儀

儀字象可甬東人布衣

風雅閒談 象可嚴灘詩江山叢建德幾許不通名一日曾垂釣千秋屬子陵此四句磊落可喜惜下半四句力弱不稱又雜詩女大不憐母花開不戀枝蠶老上山坐燕長出巢飛阿媼勿懊惱不憶嫁翁時絕似古樂府象可初學爲詩不肯摹唐人音格見當時所稱前七子後七子輒唾之喜在佳山水間每所過酒家梵舍常

作詩題壁不署姓名周貞靖偶過某寺見壁上詩大爲  
驚服下拜初不知所作何人及赴官嶺南聞象可名相  
邀同行一日舟中象可出平日詩稿示之貞靖見有壁  
句更大驚喜由是恨相見晚論詩益驩

王洪

洪字希範錢唐人洪武十三年進士除行人遷  
吏科給事中改翰林院檢討歷修撰侍講左遷  
禮部儀制司主事

曝書亭集 洪敏於才在翰林時屬國以方物貢者不  
絕麒麟白澤騶虞芝草醴泉凡有歌頌以命洪輒立就



與解縉王僭王僭王璉王達號東南五才子僭最自負  
獨推重洪不敢與齒

丁麒丁麟

麒字彥禎官至濟南府麟字彥祥海鹽人洪武  
乙丑進士除給事中改御史坐法死

明詩綜 武原雙丁兄麒弟麟嘉禾二王兄鏞弟鈞詩  
雖格調卑卑然先民有作鄉曲後學不可不爲表章也  
彥禎如烟寺行吟云得句便題林外竹脫巾長挂塔前  
松送人云西山日落烏啼急南國風高鴈影稀天星湖  
云隄畔馬銜芳草碧沙頭人上畫船輕聞琴邨云別鶴

不聞雲外語野鳥時向屋頭鳴亦能拔俗

劉季篴

季篴名昭以字行餘姚人洪武甲戌進士歷官雲南參政推刑部侍郎左遷工部主事充永樂大典副總裁

姚江逸詩 司寇纂修永樂大典爲副總裁詩統稱其詩冲澹有陶韋之趣

黃淮

淮字宗豫永嘉人洪武丁丑進士洪熙初入內閣兼武英殿大學士累官少保戶部尚書諡文

簡有介庵省愆歸田等集

靜志居詩話 長陵北征留文簡輔皇太孫漢庶人中  
以蜚語繫詔獄十年遂以省愆名集集中詩所云寶劍  
蘊豐城斑斕土花碧又云十年頓足園扉閤時向墻頭  
看柳色是也因是受知宣廟特深當其入朝賜游西苑  
肩輿登萬歲山宴太液池親灑宸翰贈行有云朝旭光  
升紫殿清相對清言良慰情留之累月不盡意歸心又  
欲東南征鴈宕峯高高不極中有謝公舊遊蹟采芝斲  
苓可長年應在天南憶天北君臣相悅可謂千載一時

劉 廌

薦字士瑞誠意伯之孫洪武二十三年襲封有

盤谷集盤谷倡和集

靜志居詩話 原昭沈夢麟元季隱於花溪田產頗饒  
其子孫坐事謫戍田亦沒官歸於誠意伯劉薦薦集中  
有花溪田舍詩云田間處處三楹屋門外家家半曲湖  
婦踏水車歌抱子兒撐漁艇笑驚鳬想見風景之足以  
移情矣

高得陽

得陽字孟升錢唐人洪武間以文學薦歷高州  
府學教授永樂初召爲宗人府經歷纂修大典

爲副總裁進講春宮

錢塘縣志 高得錫洪武間名重一時姚廣孝嘗稱其  
詩韶濩迭奏綺組雜陳江漢奔流曲折千里而不可遏  
洵一代之奇作云

胡溫

溫字遵道會稽人

靜志居詩話 溫異人也少落鳧湖海間後入閩性好  
飲漳帥徐玉好士溫特過其家玉召飲同官俄而溫至  
歌詩起舞至漫罵坐客玉亦不厭也著書名曰竹帛流  
芳載元忠臣義士并貞烈女叙其本末系之以辭類鏡

歌輕重皆有深意一日告徐玉曰吾將歸矣負橐行三  
舍爲關卒阻而回發橐中只有硯一易酒飲之起舞作  
喜鵲之歌歌畢仰戶而死歌曰閩山喜鵲少越山喜鵲  
多如何不歸去其奈羅網何

應履平

履平字錫祥奉化人洪武庚辰進士官終雲南  
布政使

閩中今古錄 奉化應方伯履平登洪武庚辰進士除  
授福建德化縣三年考滿吏部試論一篇文雖優而貌  
類侏儒不得列乃題詩部門之前云爲官不用好文章

只要鬚鬚及胖長更有一般堪笑處衣裳纒得硬綳綳  
末不書姓名閤者以此呈冢宰冢宰曰此必應知縣也  
取其文覽之果高次日奏陞考功司郎中越三年出爲  
常德知府又三年陞貴州按察使仕終雲南左布政使  
然一詩之感動於人而冢宰亦知過能改皆可以示後  
故錄之

張淵

淵字子靜吳興人

南濠詩話 吳興唐廣性勤爲人雅有風致尤善詞章  
嘗手錄周公謹癸辛雜識見其中載方萬里穢行之事

意頗弗平是夜忽夢方來曰吾舊與周生有隙故謗我  
至此君能文者幸爲我暴之明日忽有人送方瀛奎律  
髓來者惟勤笑曰得非方先生惠我耶惟勤鄉人有張  
子靜者工於詩少嘗學東坡出語酷似之嘗夜夢坡云  
授以詩法明日人有以坡詩一部寄子靜子靜因自號  
夢坡居士

陳 耑

耑字子肅錢塘人

歸田詩話 陳耑字子肅生富豪家與予同歲從叔祖  
學詩好爲奇俊語春日遊湖上有句云茜紅女兒歌白



全宋詩 卷二十一  
芋墨黑燕子來烏衣後商於閩中盤桓妓館寄予詩云  
青銅三百一斗酒荔子十八誰家娘信奇俊可喜逾一  
歲竟卒於妓館年始二十三云

陸仲連

仲連錢唐人

歸田詩話 鄰友陸仲連新娶忽詠梅花詩云練裙綰  
袂誰家女背立東風怨曉寒不久遽卒蓋識兆也

劉子華

子華字昭甫山陰人以明經薦授大興同知改  
青州推官

嘉靖山陰志 劉子華字昭甫洪武初以明經薦太祖  
御奉天門召賦常遇春晚詩子華立賦曰揮戈十載定  
河山忽報星沈易水灣馬首西風旗旆卷天涯落日凱  
歌還功成楚漢興亡際名在韓彭伯仲間聖主思功心  
獨苦黃金真欲鑄真顏大稱旨授大興同知

張尚禮

尚禮金華人官監察御史

古今詩史 金華張尚禮洪武間拜監察御史一日作  
宮怨詩云庭院沈沈晝漏清閒門青草共愁生夢中正  
得君王寵又被黃鸝叫一聲帝以其能摹宮壺心事下

蠶室而死

滑 壽

壽字伯仁號櫻寧生自許昌徙餘姚以醫名世  
姚江逸詩 壽自許昌徙餘姚始從韓說游日記千餘  
言操筆爲文有風致尤長於樂府

楊 彝

彝字宗彝餘姚人別號銀唐生洪武中舉爲沔  
陽倉副使遷都察院司獄調長泰主簿推吏部  
考功司主事謫居雲南有鳳臺貴竹東屯南游  
諸橐

姚江逸詩 彛字宗彛別號銀唐生乘牛出入四明洞  
天箕踞長嘯狀其草木水石題於上趙考古不喜時彥  
詩一日讀宗彛所寄拍几朗誦反覆不能罷已而雙手  
皆赤嘗見松鼠飛鳴拾瓦礫擲之應手而墮考古以爲  
偶爾再擲復然又能掌上置酒婆娑而舞不傾涓滴伎  
藝之精如此

桂衡

衡字孟平仁和人洪武時爲錢唐訓導轉谷府  
奉祀有紫薇稿

萬歷杭州府志 孟平博學能文詩極穠麗每一篇出

人競傳錄

莫璠

璠字仲璵錢唐人

浙江通志 仲璵居西湖與劉泰爲詩酒友讀史三篇  
慨然慕謝安石文文山謝疊山之爲人意氣橫發音節  
悲壯有古烈丈夫之風

張壹民

壹民名員以字行餘姚人洪武中以薦爲開化  
教諭

姚江逸詩 壹民工詩及字畫貴勢人乞之不肯下筆

戴笠着高齒屐笑傲自適左目無瞳子自稱左瞽戴九  
靈稱其落落有奇節素以貲雄其鄉員輕財好施有以  
窮歸之者卽共其有無遂至匱乏每遇食飲不繼則清  
坐終日或與妻徐氏援琴而彈一唱三嘆陶然自足也

陳約

約字博文嘉善人洪武時歷官大理寺卿出爲  
山西布政使有一默居士集

浙江通志 約通五經子史元季放情湖海與楊廉夫  
顧仲瑛以詩倡和名重於時

倪安仁

安仁字安道餘姚人

姚江逸詩 安道諱安仁諳天文歷律之學隱於賀溪  
與宋元僖趙考古詩筒往來不絕元僖同滑伯仁過倪  
氏深秀樓有滑公江海客頻到賀家溪采藥行雲際吟  
詩過水西之句趙考古次倪安道十韻俱備載逸詩而  
安道原韻卒不可得梨洲先生深以爲憾今於家乘撫  
得一絕亟爲補入亦全鼎之一巒也

按姚江逸詩輯於國初黃梨洲之手同時鄒靜嶽  
爲之彙刻而原板散佚今所流傳者乃康熙戊戌倪  
繼宗之所重刻也繼宗以原刻之第十四卷爲黃宗  
會姜廷梧兩家詩宗會爲梨洲季弟梨洲不應自稱  
後學遂改入續集而以莫子純以下諸家詩補之安  
道亦以其所補入者故叙傳中有梨洲深憾不得安

道詩之詒不知梨洲之稱後學對一鄉之先達而統稱之於義何礙其輯詩時宗會廷梧俱先卒故以之入選也第梨洲輯詩而於其父忠端公直書其名曰尊素其他叙傳有與忠端關涉者直稱爲黃忠端皆與子孫紀述先人之例不符則疑倪氏重刻之本不惟改涉十四卷於全書俱有更竄矣

時銘

銘字季照以字行慈谿人

寧波府志 季照好學能詩漁獵經史爲文奇正間出變化不窮洪武二十九年爲鄞學訓導已而赴京和御製思得人詩上獎諭召對特授監察御史未幾爲崇仁令有政績歷陞四川按察僉事嘗夢蒼顏縞衣人授以墨文思益進因號所著詩文爲夢墨稿行於世



吳廷恒

廷恒麗水人

浙江通志 廷恒洪武中舉明經任王府記善有百韻  
梅花詩詠史詩槐溪吟稿

王叔英

叔英名元采以字行黃巖人洪武中爲仙居教  
諭後知漢陽縣建文初召爲翰林修撰靖難師  
起奉詔募兵至廣德自經於元妙觀有靜學齋  
集

備遺錄

王叔英字元采號靜學黃巖人洪武中爲漢

陽縣知縣革除初召爲翰林修撰上資治八策識者知其有經濟遠畧靖難師起奉命募兵廣德知事不可爲乃沐浴具衣冠書絕命詞曰人生穹壤間忠孝貴克全嗟余事君父自昔多過愆有志未及竟奇疾忽見纏肥甘空在案對之不能嚙意者造化神有命歸九泉嘗聞夷與齊餓死首陽巔周粟豈不佳所見良獨偏高蹤遠難繼偶爾無足傳千秋史臣筆慎勿稱希賢又書於案曰生旣久矣愧無補於當時死亦徒然庶無慙於後世遂自經而死

三台詩話 靜學王公叔英初冒姓遜志齋集有與

陳元采兩書又詩曰立言溫粹懷陳采皆公也其復姓  
當自令漢陽後先輩未聞言及明未嘗贈禮部侍郎諡  
文忠亦罕知者 靜學募兵廣德知事不可爲大書案  
上曰生旣久矣愧無補於當時死亦徒然庶不慚於後  
世并題絕命詞一章付同鄉道士盛希年公死後數十  
年無表章者楊文貞士奇感公審理之薦悽愴懷舊於  
叙仙居潘氏譜慨然及之又屢書托廣德守訪公遺蹟  
至正統六年翠渠周公作牧始爲表墓刻其詩碑陰於  
是公之事迹章著矣人知義舉出於周豈知周又受楊  
旨余前過王公故里有死憐羽士收骸骨生魏門人撰

墓碑之語深悔立論之刻

張輿

輿字行中仁和人

柘軒集作  
景德人

刑部主事與弟輅

俱以詩名有聯珠集

委巷叢談 洪武中浙江都司徐司馬令郡城人家植  
冬青樹於門數年後街市綠陰匝地張輿賦詩云比屋  
冬青樹人皆隱綺羅春風十年後維恐綠陰多

史靖可

靖可鄞人中書舍人

靜志居詩話 潛溪之歸也孝陵語之曰大江春來風

浪多宜就裏河達於家靖可送行詩蓋賦以紀實也送  
宋學士詩君王親爲計歸程幾日攜家出鳳城江上春  
來有風浪扁舟好向裏河行

葉見泰

見泰字夷仲臨海人刑部主事有蘭莊集

靜志居詩話 夷仲侯城之友其贈侯城詩云我友方  
濟寧有子字希直而侯城集中有祭葉主事文云昔我  
先公與公最懽我爲童穉輒觀公文謂公名人非我敢  
見乃辱受知不我愚賤譽我勉我待以友朋再薦而起  
實忝同徵舟行千里連床接膝飛觴賦詩樂意橫溢蓋

論交在紀羣之間者也

胡奎

奎字虛白海寧人寧府教授有斗南老人集

南濠詩話

海寧胡教授虛白洪武間歸自江西泊舟

番君之望湖亭見亭上石刻東坡詩一絕云黑雲堆墨  
未遮山白雨跳珠亂入船卷地風來忽吹散望湖亭下  
水連大虛白廣其韻曰鷗外清波鴈外山望湖亭下繫  
歸船夜深起坐占風信人在珠官月在天書之於壁忽  
有老者來誦其詩曰子非斗南老人耶乃爲長揖舉首  
不知所往虛白因自號斗南老人

靜志居詩話 虛白泊舟鄱陽望湖亭見石刻東坡詩  
黑雲堆墨未遮山絕句次韻和之書之於壁俄見一隻  
來誦其詩曰子非斗南老人耶乃爲長揖回顧不知所  
之因以斗南老人自號高青邱贈胡校書詩所云簞弄  
明月琵琶洲者是已其詩功力旣深格調未免太熟誦  
之若古人集中所已有者

芸亭詩話 人有見題咏而漫爲次韻反貽笑於大方  
家惟海寧胡虛白和東坡題望湖亭詩爲得之

兩浙名賢錄 胡奎字虛白海寧人長於詩嘗過望湖  
亭和東坡詩書於壁有老人觀之曰六百年來無此作

矣君非斗南先生耶言訖忽然不見故人稱爲斗南先生

櫟李詩繫

禹氏名淑靜字素靖吳守正妻居崇德石

門鎖元季苗獠之亂亟與夫操舟以遁苗及之叱淑靜止淑靜度不免遂抱幼女投水中死明日得屍僵立如生藁葬其地守正入越亦死兵間遺孤德昂無依去金華山中爲僧後渡錢唐省墓宋學士濂序以送之稱其至孝有儒行會修元史德昂入京以母死事告於史氏遂得列傳歸廬毋墓榜曰白雲先壟鎮人表爲貞母阡徐一夔有記胡奎有詩云石門山前箭如雨朝別良人



暮爲鬼石門山下百尺泉一日身死名千年至今石門  
山下路烈婦人稱禹家墓墓前斜日一僧歸卽是當年  
十歲兒又明初德祥法師詩云雙樹不單代土中無悲  
根雙魚得一網水中無怨鬼石門水不深不著無義金  
石門墳不高凜乎三尺刀

吳敬夫

敬夫杭州人

歸田詩話 亡友邱彥能藏蘆花被圖蓋模寫酸齋梁  
山澡故事黃泰甫首題律詩一首吳子立繼之其餘數  
首而已彥能寶惜此卷不妄與人題後遇吳敬夫以其

有詩名出而求題敬夫爲賦數首皆不愜意最後一首  
云秋風吟就蘆花被一落人間知幾年澤國江山今入  
畫詩人毛骨久成仙高情已落滄洲外舊夢猶迷白鳥  
邊展卷不知時世換水光山色故依然彥能喜始請登  
於卷

張羽

羽字來儀烏程人累官翰林待制太常寺丞所  
著有靜居集

歸田詩話 宣和畫瓶中折枝木犀莫士安嘗舉鄉人  
張來儀一詩云玉色宮瓶出內家天香濃浸月中葩六

宮總愛新涼好不道金風捲翠華爲予稱誦之予遂擬作一首云金溝水活玉瓶寬分得天葩下廣寒可惜秋香容易落不如留向月中看士安亦稱善

無聲詩史 來儀畫法米敷文高尚書一家世但知其工於文而不知其妙於畫可見昔賢之能事也李日華太僕六硯齋筆記載其曾臨高房山山水感而作歌有我縱有心嗟欲老之句又云乾坤浩蕩江湖濶使我執筆將何從蓋深得畫趣者來儀詩名與高啓並侶明初詩人所謂高楊張徐者也

章彥復

彥復杭州人

歸田詩話 彥復自閩回杭先君飲之彥復卽席指雞  
爲題命賦予勉成四句以呈云宋宗窗下對談高五德  
聲名五彩毛自是范張情誼重割烹何必用牛刀彥復  
大加稱賞手寫桂花一枝并題詩其上以贈云瞿君有  
子早能詩風采英英蘭玉姿天上麒麟元有種定應高  
折廣寒枝時予年始十四云

陳 瑶

瑶仁和人

歸田詩話

仁和誠意齋生陳瑶爲學勤敏而性資老

成憲官至學出對云筆底春風轉轉生瑤對曰簷間晚  
溜嘈嘈瀉又出對云輕搖紈扇清風透入人懷瑤對曰  
高捧玉盤明月飛來我手庭下芭蕉開花命題賦詩瑤  
一聯云白藕作花還葉葉碧蜂生子自房房形容酷似  
之諸生皆袖手後以歲貢赴京除叙州邑簿非其志也  
後被累謫死南荒惜哉

章 震

震黃巖人

黃巖縣志 章神童震八歲能詩謝文肅公嘗以楮扇  
命題操筆立就云流水往來急青山遠近齊相期恐相

失冒雨過橋西公大奇之

劉剛

剛字養浩義烏人

義烏縣志 劉剛嘗製鐃歌鼓吹曲十有二篇金華胡翰評其篇次體制皆承柳子厚之舊而才氣橫發音節鏗鏘則得之宋潛溪蘇伯衡謂其才雄氣暢詞與事稱有古作者之風

張穀

穀字廷璧號古學臨海人洪武中舉賢良方正授河南太倉訓導改仙居

臨海縣志 廷璧工草書善詩文方正學論其詩刻峭  
新秀調信奇矣欲其知所趨向由大路而不失馳驅之  
正馬所著有張古學文集古學其號云

沐雲詩話 張穀巾山看月詩云曠望天地寬泠然起  
遐想又題鄭行人讀書處有云白鹿爲何索高價紫陽  
不是貪幽概俗物眼前要掃除妙理胸中乃融契詩多  
奇句方正學會贈詩云杯酒論心真幾人天台張穀舊  
相親

按古學博極羣書工草隸詩文與黃巖王靜  
學寧海方正學共相友善時稱台州三學

吳 慥

慥杭州人敬夫之子

歸田詩話 吳敬夫之子慥爲官四川敬夫思之作詩  
云劍閣凌雲鳥道邊路難聞說上青天山川萬里身如  
寄鴻鴈三秋信不傳落葉打窗風與雨孤燈半壁夜如  
年老懷一掬鍾情淚幾度沾衣獨泣然嘗爲予誦之敬  
夫卒慥丁憂還家訪予自誦其詩曰薄宦蕭然作遠遊  
行囊那得一錢留孟光不比蘇秦婦肯笑歸來只敝裘  
自誇其廉且矜其妻之賢也予因舉敬夫前詩謂曰尊  
翁有念子之情而子乃獨歸美其婦何耶慥慚而去



全浙詩話卷二十八終